

Dr. sc. Boris KREŠIĆ, vanredni profesor
Pravni fakultet Univerziteta u Tuzli
boris.kresic@unitz.ba

UDK: 347.625.7 (497.6)
Primljeno: 1. travnja 2022.
Prihvaćen: 10. svibnja 2022.
Pregledni znanstveni rad

Dr. sc. Ervina HALILOVIĆ, docentica
Pravni fakultet Univerziteta u Tuzli
ervina.halilovic@unitz.ba

Ena MORANKIĆ, mag. iur., student trećeg ciklusa studija
Pravni fakultet Univerziteta u Tuzli
ena_115@hotmail.com

NASLJEDNOPRAVNI I IMOVINSKOPRAVNI UGOVORI IZMEĐU BRAČNIH PARTNERA U BOSNI I HERCEGOVINI

Sažetak: Savremeno porodično i nasljedno pravo, kako uporedno tako i u Bosni i Hercegovini, reformirano je u mnogim segmentima. Normiranjem ugovornog imovinskopravnog režima u porodičnom zakonodavstvu u Bosni i Hercegovini bračnim partnerima data je mogućnost da svoje imovinskopravne odnose urede putem bračnog ugovora, dok se ugovorom o nasljeđivanju ostavlja mogućnost postavljanja nasljednika na cjelokupnoj postojećoj i budućoj imovini ugovornog ostavitelja.

Uvođenje bračnog ugovora i ugovora o nasljeđivanju u pozitivno zakonodavstvo, istina samo u jednom entitetu BiH i Brčko distrikta Bosne i Hercegovine, sa relativno malim brojem zakonskih odredaba jeste jedan od razloga postavljanja niza pitanja teorijske i praktične prirode koji zahtijevaju odgovor. Imajući u vidu važnost ovih instituta autori u ovom radu nastoje dati odgovore na neka od ovih pitanja kako bi doprinijeli budućoj reformi ovih instituta, ali i unapređenju prakse. Posebnu pažnju autori posvećuju pravnim karakteristikama ovih ugovora, uslovima za njihovo zaključenje i pravnim posljedicama istih. U radu se takođe ukazuje na određene probleme koji bi se mogli pojaviti u praksi, kao i na ambivalentno značenje pojedinih normi.

Gljučne riječi: Bračni ugovor, Ugovor o nasljeđivanju, bračni/vanbračni partneri.

1. Uvod

Uvođenje mogućnosti zaključenja bračnog ugovora znači uporedno postojanje dva imovinska režima – zakonskog i ugovornog, o čijoj primjeni bračni partneri odlučuju (ne)zaključenjem istog.¹ Njegovim zaključenjem bračni partneri isključuju primjenu zakonskog režima na imovinu koju budu stjecali nakon sklapanja braka, ili su je već stekli u braku.² Bračni ugovor u BiH prvi regulira Porodični zakon Republike Srpske³ (u daljem tekstu PZ RS), nakon toga ovaj institut uređuje Porodični zakon Federacije Bosne i Hercegovine⁴ (u daljem tekstu PZ FBiH), i konačno bračni ugovor normira Porodični zakon Brčko Distrikta⁵ (u daljem tekstu PZ BD). Izmjenama i dopunama

¹ Traljić, N., Bubić, S., Porodično pravo, Univerzitet u Sarajevu, Sarajevo 1998., str. 85.

² *Ibid.*

³ Porodični zakon Republike Srpske, Službeni glasnik Republike Srpske, br. 54/02, 41/08, 63/14, 56,19.

⁴ Porodični zakon Federacije BiH, Službene novine Federacije BiH, br. 35/05, 41/05, 31/14,32/19.

⁵ Porodični zakon Brčko distrikta, Službeni glasnik Brčko distrikta, br. 66/07.